

Pakar: Jangkitan baru dalam masyarakat satu peringatan usah leka

SINGAPURA sedang mengalami jangkitan Covid-19 dalam masyarakat yang terburuk dalam hampir setahun – satu peringatan tentang bagaimana keadaan virus ini boleh meletus tanpa amaran.

Namun, jika protokol penjejakan kontak, ujian dan kuarantin adalah berkesan seperti dahulu, dan orang ramai terus berwaspada, keadaan semasa boleh dikawal dalam minggu berikutnya atau lebih, kata para pakar dalam laporan *The Straits Times*.

Kelompok jangkitan Hospital Tan Tock Seng (TT-SH), di mana 35 orang dijangkiti, merupakan kelompok hospital pertama negara ini dan merangkumi kakitangan dan pesakit.

Seorang pesakit wanita berusia 88 tahun telah meninggal dunia akibat virus itu.

Kes baru-baru ini menunjukkan bahawa setiap orang tidak boleh bersikap relaks, walaupun untuk seketika, tekan Profesor Teo Yik Ying, dekan Sekolah Kesihatan Awam Saw Swee Hock Universiti Nasional Singapura (NUS).

“Kami telah lihat berulang kali bagaimana negara-negara perlu mengetatkan sekatan atau mengenaikan satu lagi sekatan pergerakan setelah mereka buka semula dan senario ini boleh menjadi satu kenyataan jika kita bersikap leka,” kata beliau.

“Saya berharap ini hanya satu jangkitan kecil dalam pengurusan Covid-19 kita, dan ia tidak akan berkembang kepada penularan masyarakat yang lebih lanjut,” tambah beliau.

Kelompok TTSH itu – yang terbesar dalam sembilan kelompok aktif kini – dan kelompok yang muncul di Terminal 1 Lapangan Terbang Changi, dengan lapan orang dijangkiti, sejauh ini menunjukkan kes pertama yang asal telah mencetuskan penularan sampingan dan mungkin juga penularan lanjutan, kata Profesor Teo.

Namun begitu, kelompok tersebut mungkin akan menjadi lebih kecil sebelum lenyap tidak lama lagi jika kesemua langkah-langkah diikuti dengan teliti.

“Setiap orang bersikap agak relaks dengan peraturan sejak kebelakangan ini dan ini akan menjadi satu peringatan yang baik untuk kita.”

– **Profesor Madya Alex Cook, naib dekan penyelidikan di Sekolah Kesihatan Awam Saw Swee Hock.**

“Jika protokol penjejakan kontak, ujian dan kuarantin kita berkesan seperti dahulu, kita harus lihat jangkitan semasa dikawal dalam tempoh beberapa minggu mendatang,” ramal Profesor Teo.

Singapura telah pun berusaha mengawal penularan virus itu, bertindak dengan pantas untuk membendung kes, melakukan ujian secara agresif dan malah, melaksanakan penutupan di empat wad TT-SH misalnya.

Profesor Teo berkata: “Apa yang penting adalah kerjasama pihak awam: Jika anda diminta melakukan ujian swab, sila lakukannya. Jika anda diberi cuti ketidakhadiran, sila patuhinya.”

“Dan setiap orang mesti terus mengamalkan langkah pengurusan selamat peribadi, seperti menggunakan pelitup dan jarak selamat.”

Jumlah kes tersebut, walaupun membimbangkan, tidak cukup besar untuk digelar gelombang jangkitan masyarakat baru, kata Profesor Madya Alex

Cook, naib dekan penyelidikan di Sekolah Kesihatan Awam Saw Swee Hock.

Jumlah kes masyarakat kini lebih rendah daripada kemuncak kes pada awal April tahun lalu, di mana lebih 40 jangkitan baru dalam masyarakat dilaporkan setiap hari.

“Setiap orang bersikap agak relaks dengan peraturan sejak kebelakangan ini dan ini akan menjadi satu peringatan yang baik untuk kita,” kata Profesor Cook.

“Ia juga peringatan kepada mereka yang menanggungkan vaksinasi mereka kerana kita tidak boleh menjangkakan masyarakat akan kekal bebas virus selama-lamanya.

“Saya tidak akan meremehkan kelompok yang kita lihat minggu ini – ia masalah yang perlu kita atasi – tetapi ia tidak sama dengan masalah yang kita hadapi pada 2020,” kata Profesor Cook, meskipun beliau menambah bahawa tidak semua jangkitan dapat dikesan.

Tahap penularan akan menjadi lebih jelas hanya dalam beberapa hari mendatang sedang kes-kes dikesan, tambah Profesor Teo.

Namun, terdapat peluang baik pihak berkuasa akan dapat mematahkan rantaian penularan, dengan adanya keupayaan penjejakan kontak, kuarantin dan ujian yang kukuh di negara ini, yang telah dibina dalam lebih setahun, kata beliau.

Profesor Teo berkata Singapura dalam kedudukan lebih baik berbanding setahun lalu, dengan lebih seperlima penduduk telah menerima vaksin mereka, keupayaan ujian yang lebih baik, kadar penggunaan aplikasi TraceTogether yang tinggi, dan kemudahan perubatan yang diperkukuh untuk menangani beberapa tahap lonjakan kes.

“Meskipun saya menjangkakan akan ada lebih banyak kes masyarakat yang akan timbul yang dikaitkan dengan kelompok aktif, protokol yang telah berfungsi itu harus sekali lagi membantu menghentikan penularan,” kata beliau.